

籌遼碩畫

卷之四

籌遼碩畫卷之四十

庚申季春

天都程開祐仲秩父輯

○遼東經略熊廷弼題爲議留賢能餉司以重新
儲事自遼陽餉司之爲東事設也每歲金錢
數百萬皆其所出納糧料數百萬皆其所收
支軍馬十數萬皆其所查覈其繁苦視各邊
管餉者已數倍之而又事出初創人多妄求
名色紛淆頭緒混亂忽新忽舊而餉食不常
時東時西而掛號重出安家已領于原籍而

此又希圖坐家偶及于一鎮而衆遂比例諸
如此類不一而足蓋新餉難而治新餉于今
日抑又難矣非精神強敏不足以當繁劇非
識見沉定不足以斷叢雜非執持堅毅不足
以柱覲覲非心思慎密不足以入細微而以
職觀于官餉郎中單崇者皆足以兼之職每
嘆海內困窮物力空窘居恒語道將曰此新
餉者在內則百姓骨髓在遼則職之骨髓也
柴立一軀能堪數折幸相愛惜然不甚以爲

皇土意每兵將妄有請乞輒持軍中宜廣大不宜
織嗇之說亟議予而職每病之獨崇據理會
覆唯唯不能奪只此一節歲所省何啻數萬
計而至其操勵之清潔則天秤欺天者投豺
舁虎法馬違法者斷子絕孫崇固有盟言在
矣自數月以來本色已空折色又盡差官四
五輩守候兩三月屢請戶部不肯發而崇之
催促乃愈急或以爲崇危崇曰眼見軍餓思
譁馬死殆半洵變在旦夕而猶避激聒之罪

不爲饑軍請命以弭此旦夕之禍是負國以
負部堂也卽部堂亦安用此負國之屬吏爲
而職以此益歎之重之今崇差滿一年矣以
親老力求代去職旣屢屢懇留又兩次遺書
計臣李汝華勿允其代謂借寇可得而不謂
竟以傳國題代也當此上下中外不肯同心
應手之時又一道病去兩道丁憂之日復奪
崇以去而與一新相知者共事職戚矣伏乞
皇上勅部議覆仍留單崇管遼東新餉以三年爲

期如各邊管餉例使官軍實受其惠度支實收其效而職亦藉手以獲同心共事之益豈曰小補之哉

○總督倉場戶部尚書等官張問達等題爲奉

旨會議守備不設律例仰候

聖裁事山東司案呈先該經畧熊廷弼題爲謹遵旨斬三逃將以正軍法併申明守備不設律例以定官守事等因題奉

聖旨這守備不設律例着該部會議具奏該臣會

同戶部尚書李汝華等太常寺少卿徐可求
等戶科等科給事中官應震等河南等道御
史房壯麗等備查得先年律例公同會議得
朝廷設官原爲保安疆土人臣效忠議在計
安社稷况守巡官以兵備爲名則綢繆劬勩
救寧疆圉豈異人任若平日不能選將練兵
臨變又不能督戰盡力悠悠忽忽互推互諉
至于弛備撤守寨城陷沒猶卸擔將帥以自
寬則

勅書所責成者謂何顧名思議兵備官誠有不得
逃其咎者况奴氛熾如燎原人心畏如赴火
尤宜倍加申飭以警積弛若僅僅以一爲民
了事則全軀保妻子之臣進無必死之虞退
有偷生之倖安往而不規避哉此經臣所爲
痛恨于邊臣偷安而欲補條例之未備也臣
等查得嘉靖二十九年舊刻續題條例內一
款云守邊兵備官駐劄該城先期托故遠出
臨時潛踪避匿及守備不設以致失陷者比

照守邊將帥被賊侵入境內擄掠人民律充
軍若守巡原無定駐止是遙制失陷者叅奏
爲民是先年條例原未嘗僅以爲民之例寬
守巡也迨後來修例者因承平日久武備漸
輕刪去守巡兵備官一段止從爲民之例而
竊祿倖生之輩遂覺官命重而法紀輕積漸
廢弛遂至于此茲當夷虜猖獗之日難同清
平無事之時自當仍申舊例以肅人心今議
守巡兵備官駐劄該城致有失陷者照舊例

充軍原無定駐止是遙制失陷者照舊例爲
民其被賊侵入境內擄掠人民不至失陷卽
係駐劄處所降三級調用如此則功令森嚴
旣惕邊臣之積玩而情罪允協仍率先朝之
舊章庶令身任巡守之寄者皆知誼無可逃
罪無可避斷不敢因循怠緩踈守備以再誤
邊疆若賣放軍役尅扣軍糧致有失陷者外
則有該地方按臣查叅之法內則有該部臣
科臣臺臣叅糾之法臣等執三尺隨其後又

當執據本律繩以大辟曷敢少縱至條例一定法在必行令難再易竊見近年以來國法廢于游移人情習于玩忽卽如近例所載守巡官駐劄該城失陷者爲民矣而爲民者誰非駐劄處所者降級矣而降級者誰所以邊臣日玩一日邊防日弛一日今自申明舊例之後凡有邊方失事應遣戍者必遣戍應爲民者必爲民應降級者必降級朝無錯貸之法自人有效死之忠肅軍令而申國威關係

非渺小矣既經會議歸一相應題請恭候

聖明裁定

勅下臣等刊布內外衙門一體永遠遵奉施行

○新補南京戶部江西司添註主事牛維曜題爲
摘目前之急務申疇昔之膚言以備採擇以
裨遼左事竊見遼左之危不啻纍卵矣職生
長西陲素諳邊務而乙卯丙辰曾待罪于寧
前山海至開原遍歷其要害東夷與西虜洞
晰其情形惟是邊疆下吏無能上瀆

宸聰曾于督撫院道條上其事謂奴酋蓄謀叵測也則有請勦建酋之議謂勦奴必用餉也則有糴粟百萬之議恐東西合謀急當渙其交而結其心也則有講款始末之議杞憂廢恤不幸言而中矣顧救昔日之遼易救今日之遼難就職之身親目覩者言之遼左燃眉急務有八而奴之所以取敗者有三焉請陳之一曰募兵近地夫足兵之法已計無復之矣調于各邊則方鎮空虛招于遠地則沿途騷擾

惟燕趙多慷慨之士曩以撫清被搶開鐵失
守寒心不敢應募今遼陽守敵愾振矣若食
以厚餉激以重利則懷竒抱異之人自有聞
風嚮附者水土服而行糧省此當急者一也
一曰開屯畿輔夫括天下之財以餉遼者利孔
亦盡開矣然千里運糧士有饑色俱非久遠
計也以職籌之畿輔左右軍屯民地拋荒不
下數十萬頃以募兵之法募屯以安家之費
易牛種其于夾海葦場蘆澤之區引流通洫

言通石書 卷之四十一
制爲水田授爲世業則從者如雲計畝分獲
當亦不下數百萬此當急者二也

一曰用遼運餉今蓋復所貯海運之糧不下三
四十萬星屯雲積防獲甚難而車轉牛輸遞
費益鉅聞南衛所募之兵全伍逃去夫此輩
旣領安家月糧十月餘來不知糜朝廷多少
實餉寧令其逸而不返耶儻俾原募之臣往
諭以義令人守其土由復蓋立撥法各以其
界交遞計人負五斗道分十撥此二萬人日

可致千石于遼城不猶愈于車牛之費乎此
當急者三也

一曰練兵寬鎮北關朝鮮皆附中國而仇奴酋
者開原失而北關擄寬鎮失朝鮮能不危乎
今當速挑精兵三萬擇一智勇道將團練于
寬鎮之間東爲朝鮮聲援西爲遼陽犄角明
獲金復之餉暗伏襲取之奇此當急者四也
一曰款制西虜夫遼之危在東西交訐耳虎賁
擁兵十萬有泰山壓卵之形特增賞數萬卽